

Visoki predstavnik podnosi izvještaj Stalnom vijeću OSCE-a

Visoki predstavnik, Wolfgang Petritsch, je danas – zajedno sa Šefom misije OSCE-a u Bosni i Hercegovini, Robertom Beecroftom – izvijestio Stalno vijeće u Beču o aktuelnom stanju u procesu provedbe mira u Bosni i Hercegovini.

Pored svoje pismene izjave, visoki predstavnik je tokom razgovora naglasio hitnu potrebu provođenja reformi u BiH, budući da je nastupio zamor donatora i da se pomoć smanjuje. Ponovo je naglasio potrebu da vlasti prihvate koncept preuzimanja odgovornosti domaćih vlasti i povedu zemlju ka napretku kroz dijalog sa međunarodnom zajednicom putem Konsultativnog partnerskog foruma. Visoki predstavnik je naglasio da postoje i ohrabrujući dokazi zasnovani na vrlo širokoj osnovi o konkretnom napretku u političkoj i ekonomskoj obnovi kao i da postoje uslovi za stvarnu promjenu. Dodao je, međutim, da političko vođstvo BiH mora prihvatiti reformu i sada donijeti teške odluke koje ona podrazumijeva.

“Završna faza provedbe Daytonskog mirovnog sporazuma će u isto vrijeme biti ključna faza ulaska u Evropu” rekao je visoki predstavnik. “Preuzimanje odgovornosti za Bosnu i Hercegovinu stoga mora biti izvršeno u okviru evropskih standarda”. U vezi sa ovim, visoki predstavnik je rekao da bi napori međunarodne zajednice trebali biti usmjereni ka integraciji Bosne i Hercegovine u Evropu. Spomenuo je da su prvi koraci u ovom procesu prijem BiH u Vijeće Evrope i ispunjavanje uslova iz “Smjernica EU” kojim bi se Bosna i Hercegovina kvalificirala za elaborat koji je neophodan za zaključivanje Ugovora o stabilizaciji i udruživanju sa Evropskom unijom. Kako se proces provedbe mira već počeo preplitati sa procesom ulaska

Bosne i Hercegovine u Evropu, visoki predstavnik je rekao da je važno održati ovaj zamah.

Sve delegacije su izrazile podršku radu visokog predstavnika i šefa misije OSCE-a. Evropska Unija je posebno naglasila da Bosna i Hercegovina može ići ka Evropi samo kao jedinstvena država i pozvala je na hitnu provedbu mjera koje su definirane u Smjernicama EU. Osim toga, EU je ohrabrila inicijative međunarodne zajednice na promoviranju nezavisnog javnog radio i tv sektora.